

RIPOOT LONG PNG YUNIVESITI

Wanpela komiti i bin kirapim wok long Ogas, 1973, bilong stiaim ol developmen insait long Yunivesiti bilong Papua Nu Gini, i bin pinisim ol wok bilong en, na ripot bilong en i no longtaim i bin kamap long Kabinet.

Dispela em i Gris Komiti na em i kisim nem bi-long siaman bilong en, Dokta Gabriel Gris.

Insait long yia i go pinis komiti hia i bin glasim ol kain wari i bin kamap insait long Yunivesiti na ripot i laik makim sampela bikpela senis.

Bikpela Timba Bisnis Stat

Long Buluma long Wes Nu Briten, gavman i bin baim 50,000 hekta bus bilong statim wanpela bikpela timba bisnis.

Wanpela kampani bilong Japan, nem bilong em, Nissho-Iwai bosim 3-pela hap bilong kampani na Developmen Beng bai bosim wanpela hap.

Bai moa olsem 1000 ol lokal pipel i painim wok long dispela bisnis.

Bihain long 5-pela yia i gat bikpela somil na faktori bilong plai-wut, na narapela faktori bilong wilwilim ol liklik hap diwai bilong wokim pepa.

Ol lokal pipel na bisnisman bai wokim ol haus na rot na stua na tu ol bai pulim ol diwai i kam long somil. Ol tu i gat wok long ranim transpot.

Gavman i tok bai olgeta yia moa olsem wan milien dola i kamap long han bilong ol wokman, i olsem pe bilong olgeta wantaim.

Bihain long 3-pela yia bai i gat nupela bris i brukim wara Kapiura na bai pipel inap draiv long Kimbe inap Silanga. Bihain tru bai ol inap skruim dispela rot i go kamap long Rabaul yet.

Na wanpela samting tu,

22,000 eka bilong ol dispela graun gavman i bin baim, i gutpela bilong gaden na kakao na wel pam. Olsem kampani i mas rausim ol diwai bilong dispela hap pastaim.

Gavman i lukaut tu bai ol wokman i no ken pinisim ol abus i stap insait long ol dispela bus na gaden.

Long narapela hap bilong Papua Nu Gini, em long Vaimo long Wes Sepik Distrik, gavman i no orait long mekim pepa wantaim wanpela bikpela kampani ol i kolim Bond bilong statim wok timba. Gavman i ting em i no inap; na i gat 7-pela arapela kampani i laik kisim dispela wok.

1. Mobeta i gat wanpela yunivesiti tasol long PNG tasol tripela hap i ken stap: wanpela wanpela long Port Moresby, long Lae, na long Goroka.

2. Yunivesiti i mas wok long painim moa studen i kambilong ol ples i no gat gutpela developmen.

3. Planti moa studen meri i mas kam na yunivesiti i mas helpim ol bai ol rot i kamap isi isi.

4. Ol studen i no ken greduet o pinisim skul long yunivesiti sapos ol i no save tok na rait long tok Pisin na Hiri Motu, tupela yet.

5. Long wanpela wanpela yia, 300 moa studen i mas kirapim skul insait long hap bilong ekstenel stadi o korespondens we ol i ken sindaun long ples bilong ol na skul long ol pas tasol.

6. Mobeta ol kos long yunivesiti i sotpela pastaim olsem wanpela o tupela yia na ol studen i kisim wanpela setifiket pastaim. Nau ol i mas wok inap wanpela o tupela yia na bihain go bek gen long yunivesiti bilong pinisim ol skul.




7. Ol studen i no inap kisim digri o bikpela mak inap ol i mekim wok pastaim.

8. Insait long olgeta yia, olgeta studen i mas wok inap tupela mun.

9. Yunivesiti i mas painimautim pastaim PNG i sot long wanem kain saveman na em i mas wok long stretim ol dispela wari tasol.

10. Olgeta studen i mas skul long ol "nesenel stadi" o ol samting bilong PNG stret.

Nupela Stem Bai Kamap 20 Novemba



• Long 20 Novemba bai Pos Ofis i salim foapela nupela stem ol i soi naispela plaua i save kamap insait long PNG ol i kolim "okid".

PAS I KAM LONG EDITA

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

TOK I SMAT PASIN NOGAT

Dia Edita.- Mi laik toktok liklik wantaim Caspar Samala Megigi bilong Goldore Timba Kampani long Vanimo.

Yes tru poro, tok bilong yu i tru tasol. Mi hepi tru long tok bilong yu. Nau mi laik askim yu.

Ol katekis i no kisim gut pe na husat bai i lukautim famili bilong ol? Bai God i kros long famili laip i no kamap gut? I tru planti samting i wetim ol i stap na sapos ol i no hepi long holim dispela wok long wanem pe bilong ol i no gutpela. Em i rong bilong ol o rong bilong ol pater na ol pipel. I nogut pater i peim ol katekis tu. Na ol pipel tu wantaim.

Yu tok long ol Aposel tru katekis em i Aposel bilong Jisas, tasol yu lukluk long ol lo insait long ol sios na long gavman i wankain olsem bipo? Sori tru, olgeta samting i senis na yumi tok kantri i laik sanap strong na olgeta wokman bai i hepi na bilong wanem ol i no gat gutpela pe.

Ol Aposel ol yet i bisop na ol i wok long strong ol i kisim yet long Jisas na ol i lukim tu Jisas i bin woka-baut na mekim mirakel ol i lukim tru long ai na ol i bilip tru. Ol tu i wantok tru bilong Jisas.

Yu ting gut, sapos yu bilong Vanimo na mi bilong Bogia, mitupela i tisa na kisim trening

long wanpela koles tasol, husat bilong mitupela i gutpela tisa?

Arakain namel long ol Aposel na katekis em i wankain tasol. Tasol ol Aposel em ol i bin lukim, harim, na pilim ol wok bilong Jisas na ol tu i bisop na sampela bilong ol i pop.

So poro, ating mogut yu mas amamasim ol katekis liklik nogut ol i kamap long yu bilong yu stretim wari bilong ol na bai yu sakim ol na bai ol i wari.

Tru pe bilong ol i no gutpela orait, mogut ol kristen kain man olsem yu Caspar, i ken helpim ol long wok bilong God long bungim ol pren long apinun beten o long go long lotu long ol Sande.

Nogut tok bilong yu tasol i smat na pasin i no smat.

Mich. U. Serero
Madang.



Raitim pas long wantok Niuspepa. Yu mas autim ol gutpela tingting bilong yu na wanem olkain hevi yu, yu gat na bai ol wantok i ken ritim.

TOK PLES LONG REDIO

Dia Edita.- Mi gat wanpela bikpela wari tru.

Watpo sampela redio stesin bilong Papua Nu Gini, i save tok ples long redio bilong ol.

Mi tok olsem bikos i gat planti tok ples long Papua Nu Gini. Na sapos ol i tok ples na arapela pipel i no ken harim wanem samting anaunsa i toktok long em.

Mi opim redio bilong mi na mi no save harim liklik toktok o nius anaunsa i ritim.

Bernadette Tasun,
Hahela/Buka Passage.

OL KRISTEN TU KONTRAK

Dia Edita.- Mi wanpela katekis, mi laik bekim pas bilong Caspar Samala Megigi. Em i bin bekim pas bilong papa Parapu Yat.

Yes, Caspar dispela olgeta toktok bilong yu i trupela. Mi no gat tok o kros long en. Em i tru mi katekis i mekim kontrak long mekim wok bilong God.

Na olsem wanem long ol bilas na kaikai bilong mipela ol famili? Olsem wanem long ol pe long ol stua i antap, na olsem wanem long pe bilong kaunsil takis?

Husat bai i givim mi mani bilong stretim ol dispela wari o hevi i kamap long mi?

Mi katekis mi mekim wok bilong stretim sol bilong husat? Long mi yet wantaim God o long yumi olgeta kristen hia long dispela kantri?

Orait yu yet yu kristen bilong dispela kan-

tri i mas helpim na karim wok bilong sios, na helpim givim mani long katekis long ranim ol wok bilong sios.

Sori Caspar, sapos yu kamap katekis, ating inap wanpela mun tasol na yu ranawe pinis.

Yu tok katekis i mekim kontrak long God. Na olsem wanem long yu, yu tu yu kontrak long God o nogat? Mi tokim yu yumi olgeta kristen long olgeta hap bilong graun i kontrak pinis long God.

Dispela bekim bilong God long ol katekis em i no bilong wanpela man tasol nogat. Dispela gutpela pe em i bilong olgeta man i holim gut ol wok na pasin bilong em long dispela graun.

Olsem long heven nau ol i kisim gutpela sindaun na kisim gutpela pe bilong oltaim.

Philip Namtane,
Wati-Nuku/W.S.D.

BILAS BILONG WAN WAN

Dia Edita.- Nau mi laik rait na toktok liklik long sampela man i save rait long Wantok Niuspepa na mi save baim na ritim.

Mi yet mi pilim sampela samting lo i rait i no stret long ol.

Yumi save nau em i laik bilong wanwan long dresap. Sapos yu dres long laik bilong yu i no gat tok long em. Sapos yu lukim ol meri i dresap kranki orait yu mas go stret long ol na tokim ol na maski long rait i go long Wantok Niuspepa. Sapos yu rait em bai yu westim taim bilong yu nating.

R. Katisa,
Kimbe/W.N.B.D.

ARAWA KIRAP BEKIM TOK

Dia. Edita.- Nau mi laik bekim pas bilong Andrew Yakau long Wantok Niuspepa namba 99.

Yes tru wantok. Yu tok olsem ol tarangu ol yangpela meri long ples ol i no save go long skul ol i save wari tumas long ol man i gat save.

Long tok bekim bilong mi, sori tru wantok ating yu daunim tru poin long ples bilong yu, laka? Em i olsem nau em i laik bilong wan wan.


Olsem yu save pinis nau long dispela taim em i narakain. Yangpela meri na man nau i yusim wanem kain man o meri long laip bilong tupela bihain i no long save.

I nogut long yu mekim sem long ol yangpela man na meri.

Yu bin tok olsem, yu wangepela maritman na yu maritim meri i no gat save na i hat long yu lainim em na yu kolim em longlong meri. Em i min olsem meri yu maritim yu kisim long rot o ol famili bilong yu i painim na givim yu.

Olsem na yu tok bilas nating long ol sampela yangpela meri. Sampela meri long ples o skul ol inap save long mekim ol wok bilong haus. Wanem kain samting tru yu save lainim meri bilong yu?

Harry A. Moani,
Arawa/Bougainville.



Dia Edita.- Long Nesenel De mipela bikpela man bilong Harpurpi mipela i karim wangepela mambu i kam long skul.

Dispela mambu i gat bilas na mipela i putim wangepela diwai long het bilong en. Diwai i gat nem:YUK.

Dispela diwai i gat dispela stori, taim mipela i wokim haus tambaran, mipela i wokim dispela diwai na mipela i putim em long haus tambaran.

Mipela i mekim olsem, em i mak: nau ol man na pikinini na meri i ken stap gut. Mipela i kolim dispela em i MAROR-tok pisin; lo.

Mipela i putim pinis lo. Em i lo bilong sindaun gut na harim na bihainim gutpela pasin bilong ples.

Ol man i sindaun long dispela haus tambaran, ol i mas' harim tok bilong MAROR na bihainim gutpela lo tasol: i no ken pait, i no ken les, i no ken tok baksait.

Ol bikpela man i skulim ol yangpela lain long ol dispela pasin. Ol lapun na bikpela man i mekim dispela skul.

Mipela bikpela man i skulim ol yangpela lain olsem ol i ken harim na bihain. Sapos mipela bikpela man i no tok, orait ol i no ken harim na bihainim arapela pasin. Em tasol stori bilong mi.

Reinhold Mare, Madang.

TU MINIT TINGTING

Ol man i krai i stap, ol i ken amamas. God bai i mekim gut bel bilong ol.

Matyu 5:4

Plantipi pipel i tingting long wangepela samting tasol. Ol i mas painim ol gutpela samting hia long graun. Ol i no laik tingting long ol plen bilong God olsem em ibin telimautim em long baibel. Nogat. Ol i laik kamap hetman tru bai ol i gat planti mani, bikpela strong, na biknem insait long ol komuniti.

Tru tumas, i no gat ples bilong planti hetman i sanap long en. As bilong maunten i bikpela; het bilong em i liklik. Insait long ol resis bilong painim hetples tru, planti pipel i save pundaun aninit long ol arapela. Husat man i stap aninit tru, em i save karim bikpela hevi.

Ating Jisas i tok long dispela man. Bai em i ken amamas. God bai i mekim gut bel bilong em olsem God i jas tru. Na moa yet, God i papa tru bilong ol.

God i laikim bai yumi olgeta i painim amamas i gutpela hia long graun. Na tu em i laikim bai husat i mekim gutpela wok i mas kisim profit i kamap long en.

Tasol God i no laikim bai yumi paulim lo bilong em i tok olsem: yumi mas mekim gut long ol narapela man, maski em bilong narapela ples, maski em bilong narapela kantri, maski em i no gat namba. (Luk 10:29-37)

Ating yu ritim gut stori bilong Jisas i stap long Luk:19-31. Ating nau yu ken save olsem wanem Jisas i litimapim ol rabisman. Bai ol trabel, ol wari, ol hevi i pinis. Tasol yumi mas bung long ol wok bilong God pastaim.

Nogut yumi lukluk nabaut long painim narapela tisa. Nogut yumi givim baksait long ol tok i tru bilong God.

Planti man i bikmaus long telimautim narapela rot long painim gutpela sindaun. Tru, yumi ken hatwok long painim em-mani, strong, biknem. Tasol yumi smat moa sapos yumi painim wok bilong God hia long graun.

MERI WANEM, BALUS O KA

Dia Edita.- Mi laik helpim tok bilong wantok Petrus Maimao bilong Bougainville.

Em i toktok long Maprik Kaunsil i baim meri long \$400 dola.

Nau mi laik askim Maprik Kaunsil wankain kwesten. Long hap bilong yumi i gat wanem gutpela bisnis? Na hamas ol i save givim yu taim yu salim kopi na kakau bilong yu?

Na ol yangpela wokman tu hamas ol i save kisim na baim meri long 400 dola. Na tarangu lapun bilong pikinini ya bai i sutim graun stret long mani.

Mi ting em i no gutpela tumas long baim meri long dispela mak bilong mani.

Mi tokim yupela ol yangpela man sapos ol i salim ol meri long bikpela mani olsem oke larim i stap i go.

Matthew Warahuli,
Port Moresby.

Pik Kamap Long Karkar

Bipo tru 2-pela man i stap long ples Gial insait long Karkar Ailan.

Nem bilong tupela, Bega na Muri. Wanpela taim pren bilong tupela i stap long narapela sait long Ailan i salim tok i kam long tupela i mas i go long wanpela pati bilong em.

Tupela i kirap i go wokabaut lusim 4-pela de na nait long rot na i go kamap long ples.

Pren bilong tupela i kam na kisim tupela i go insait long pait. Insait long pati planti pipel i mekim tok gris na pilaipilai na pani, olsem ol i amamas.

Taim ol i tilim kaikai ol i lusim tingting long givim wanpela dis kaikai long Bega.

Pati i pinis Muri na Bega i go bek long ples bilong tupela. Tupela i wokabaut long rot Bega

i hangre, em i askim Muri long givim em sampela kaikai. Tasol Muri i no laik givim sampela kaikai long Bega.


Long rot Muri i go pekpek long bus. Taim Muri i kam bek long rot Bega i go insait na i kaikai pekpek bilong Muri.

Muri i lukim na i tok long Bega, pren yu no ken kaikai pekpek. Bega i tok, tasol taim mi askim yu long kaikai na yu no givim mi. Taim Bega i tok olsem nau em i tanim i go olsem pik.

Tupela i kamap pinis long ples Muri i singautim Bega long go antap long haus, tasol Bega i go aninit long haus na slip.

Ol pik long Karkar Ailan i kamap olsem.

M.G. Mowan,
Karkar Ailan,
Madang.



PLANTESIN WOKIM HAISKUL

Long yia 1958 lain katolik misinari ol i kolim Divain Word Misinari ol i bin baim Dugumur Plantesin long hap bilong Bogia, na ol i bin makim ol winmani bilong dispela plantesin bai i mas go long wokim wanpela nupela haiskul long Madang.

Ol i mekim mekim na long yia 1967 i gat inap mani bilong statim dispela skul.

Em ol i kolim Divain Word Haiskul na hetmasta bilong en, Pater Feehan.

Tude i gat samting olsem 450 sumatin man na meri i skul hia. Ol i bilong Madang na Is Sepik, Isten Hailans, na Enga Distrik.

Sampela ol i winim skul pinis na i tren nau long Yunivesiti o tek skul o tisa koles. Na sampela tu i painim gutpela wok pinis.

Dispela bikpela haiskul i kostim moa olsem 400,000 dola na olgeta dispela plantesin bilong misin long Dugumur tasol.

Olsem tasol ol pipel i ken lukim long ai bilong ol yet, olsem wanem ol plantesin bilong misin i save helpim go het bilong dispela kantri na ol pipel bilong en.

Sapos gavman i mas wokim dispela kain skul, em bai kisim mani we? Em bai kisim long ol takismani. Na takismani i kamap we? Long poket bilong yu na ol pipel tasol.

Komuniti Developmen

Port Moresby Komuniti Developmen Grup i bin kisim \$15 tausen i kam long wanpela grup long Australia ol i kolim em *Community Aid Abroad*.

Dispela mani bai i go long baim ol wok bilong 6-pela komuniti developmen ofis na bilong baim ol ekspens i kamap insait long ofis.

Community Aid Abroad i save ol kain ogenai-sesen long Papua Nu Gini na long Saut Is Asia na long ol Pasifik Rion.



● Yumi lukim hetman bilong ol Divain Wod Misinari bilong Papua Nu Gini, Pater Bus, i givim bikpela mani i go long han bilong Mista Stephen Liklik, presiden bilong studen kaunsil long Divain Wod Haiskul long Madang. Man i winim ol dispela mani long wok bilong em, em Mista Reinhold Schaar, bosman bilong plantesin i sambai na amamas. Pater Feehan, em i hetman bilong dispela haiskul.

Tupela Edukesen Ofisa Raun Long Ol Kantri

Tupela ofisa bilong Dipatmen ov Edukesen i bin pinisim ron nabaut long planti kantri bilong painim ol gutpela we bilong wokim ol eksaminesen.

Mista Simon Kunai na Mista Ted Vagi i bin lusim 5-pela wik long Princeton Yunivesiti long Amerika, we planti lida insait long ol wok edukesen long Afrika, Saut Amerika, Asia, na planti ol Pasifik kantri i bin bung.

Bihain tupela i bin go long Ghana, wanpela kantri long Wes Afrika, na long Malaysia we tupela i bin lukim ol we bilong wokim eksaminesen insait long planti diveloping kantri.

Papua Nu Gini i wankain olsem ol dispela kantri long ol wok edukesen, Mista Kunai i tok, na olsem PNG i no gat planti mani na ol saveman, mipela i ken bihainim planti gutpela pasin ol dispela kantri i bin hatwok long painim.

Saut Pasifik Komisen, Komonwelt Seketeriet, na Dipatmen ov Edukesen, tripela wantaim i bin wok long baim ronabaut bilong tupela ofisa.

Moa Wari Long Ol Timba Industri

Mista Bruce Jephcott, Minista bilong ol Neseral Risosis, i bin mekim bikpela na strongpela tokaut gen long ol wari i kamap insait long ol timba industri.


Tingting bilong em i go long painim we bilong kirapim wanpela pepa industri hia long PNG.

Japan i namba wan maket bilong baim ol timba bilong PNG tasol nau Japan i hap hapim ol dispela bisnis. Olsem tasol nau i gat planti timba moa timba i wet hia long painim wanpela maket.

Hia long Papua Nu Gini i gat sampela kampani i wok long katim ol timba nau ol i karim bikpela hevi olsem ol i no ken painim gutpela maket na planti wokman klostu i laik lusim ol wok.

Mista Jephcott i tokaut long wanpela trabel i bin kamap insait long Indonesia i no longtaim i go pinis.

Las yia tasol ol lokal pipel i belhat nogut long ol kampani bilong Japan i wok insait long



Bruce Jephcott

Long Sevis Medal



Namba wan ofisa bilong l P.I.R., Kenel T. Diro, i givim wanpela medal long Saiden Unai Lava bilong Maopa Vilas insait long Sentral Distrik bilong makim ol gutpela wok Saiden i bin mekim inap 18 yia em i bin stap long PNG Difens Fos.

Kaunsil Laik Klinim Rabaul

Rabaul Taun Kaunsil i gras na sapos ol i slo wokim wanpela lo i tam- tumas, orait bai kaunsil buim ol man long tromoim yet i katim na papa i ol pipia nabaut na long mas baim ol dispela wok. larim ol gras i kamap Ol papa bilong graun longpela long ol graun. i mas orait pastaim bipo Ol papa bilong graun ol arapela pipel i ken ol i mas hariap katim ol tromoim ol rabis long en.

Indonesia. Ol pipel i bin pait na bagarapim planti samting bilong ol dispela kampani olsem ol wok bisnis bilong Japan i bin go daun moa moa yet.

Nau ol kain wok i sot na planti pipel i no gat mani na ol i krai long Japan i hariap na kirapim ol nupela bisnis gen.

Nau tasol Japan i baim liklik timba i kam long Indonesia. Dispela i go daun inap 40%. Kos bilong ol timba i bin go daun inap 60% na 30 kampani i bin bagarap olgeta na 10-pela kampani moa bai i pinisim ol wok long dispela yia.

Mista Jephcott i tok em i laik hariap salim ol timba diwai i wet nau long painim maket tasol Gavman i no ken paulim dispela timba industri bai i gat narakain trabel i kamap long en bihain.



Nambawan marasin bilong olgeta pen

MICROFINED FOR RAPID ABSORPTION
CONTENTS: 25 TABLETS

'ASPRO'

FOR HEADACHE PAIN, COLD & FLU SYMPTOMS

Skul Bilong Wok Laibreri



Planti moa yangpela pipel bilong 15 kantri bilong Asia, Afrika na ol hap bilong Pasifik, i stap long wampela kos long Australia we ol i skul inap tripela mun long ol we bilong lukautim ol laibreri.

Gavman bilong Australia i peim ol kos bilong dispela skul.

• **Poto:** Long Sen Leonards Koles long Melbourne, Australia, Mis Bonnie Raka bilong Vabukori viles long hap bilong Port Moresby, i lukim ol buk wantaim Misis Helen Pitt, em meri i bosim dispela laibreri, na tupela studen bilong koles, Susan Morris na John Prime.

Kina Toea Redi Long Epril

Minista bilong Fainens, Mista Julius Chan, i tok nupela mani bilong Papua Nu Gini stret bai i kamap long mun Epril, 1975.

Tupela mani bilong PNG na bilong Australia bai i wok wantaim inappinis bilong yia 1975.

Nupela mani pepa bilong PNG bai i kamap olsem: 2 kina, 5 kina, na 10 kina. **Kina** i wanmak bilong dola.

Nupela mani papa, ol i kolim toea, bai i kamap olsem: 1, 2, 5, 10, 20, 100. **Toea** i wanmak olsem sen.

Risev Beng ov Australia i wok nau long prinin ol kina. Ol toea ol i wokim long London, wampela siti insait long Inglan.

Korespondens Skul Fis

Dokta Reuben Taureka, Minista bilong Edukesen, i makim nupela korespondens skul fis.

Wampela sabjek bai i kostim \$15, Dokta Taureka i tok.

Polisi bilong Gavman i olsem: olgeta dipatmen i mas wok moa moa long painim ol mani inap long baim wok bilong ol.

Tenkyu Long Nevi



• Kenel C. East, Ekting Komanda bilong PNG Difens Fos, i givim gutbai na tenkyu long Leptenan Stephen Howlett, kepten bilong wampela woasip bilong nevi bilong Australia, H.M.A.S. Wewak.

Dispela woasip i bin pinisim tupela mun long ol solwara nabaut long Papua Nu Gini we em i bin rausim planti bom i bin hait longtaim aninit long solwara.

Namba Wan Ofisa bilong nevi i stap insait long PNG Difens Fos, Kepten J. Lancaster, i sanap lukim tupela.

NAMBAWAN KAIKAI BILONG OL FAMILI



Lukautim bai tripela kaikai hia i swit na i gat strong long en i stap oltaim long haus bilong yu.

HEINZ kompani i yusim gutpela samting tasol bilong wokim ol dispela kaikai.

Sapos yu laik hariap redim strongpela kaikai - na tomato sauce i gutpela tru na swit moa - lukautim mak bilong HEINZ.

Heinz

2167E



Sir John Kerr, Gavna Jeneral bilong Australia i bin givim bikpela ona bilong Kwin Elisabet i go long Sir Paul Lapun, Minista bilong ol Maining na Eneji.

Dispela ona i makim gutpela wok Sir Paul i mekim longtaim long Haus ov Asem-bli long helpim kantri i go het.

• *Poto: Sir Paul Lapun i kisim ona ol i kolim naithut long han bilong Gavna Jeneral bilong Australia, Sir John Kerr.*

Wanpela meri-pasto i bosim ol wok bilong Luteran Wol Federesen i save helpim ol meri, Eva Zabolai-Csekme, bai i mekim liklik lukluk nabaut long ol Luteran misin stat long 7 Novemba.

Long 10 Novemba em i laik bungim ol meri long Yunaitet Sios long Lae.

PNG Nes Long Australia

Wanpela nes bilong Port Moresby nau i wok long wanpela medikal kos long Melbourne, Australia, long lukautim ol manmeri i gat ol kain kain sik i bikpela tru.

Em Sista Susan Tamarua.

Rotary Klap bilong Waverly i bin stretim ol samting bai Sista Tamarua i inap go long dispela kos long Royal Melbourne Hospital i stap inap long 7-pela mun.

Sista Tamarua i gat tupela memba bilong famili bilong em i bin kamap dokta pinis na nau tupela i wok long wanpela kos long Nu Silan bilong kisim bikpela training moa.



• *Poto: Sista Susan Tamarua i wokabaut wantaim Sista Marilyn Anthony ausait long haus bilong ol nes tasol long Royal Melbourne Hospital.*

Wantok...
Yu laik go we?
Yu laik go mekim wanem?
Yu laik go long malolo?
Yu laik go lukim ples na papamama?
Yu laik go long pilai?
Yu laik go long wanem hap tru?

Wantok...

Yu no ken wari tumas long ol dispela askim. Talair i gat save tru long dispela samting. Larim Talair i ken helpim yu—na bai yumi amamas wantaim!

Sapos yu laik bosim balus bilong yu yet, i orait tu. Talair i gat kain kain balus yu ken chata. Em i chata bilong yu yet. Taim yu laik redi—balus bai i go. Yu yet ken makim taim bilong balus i ken i go.

Sapos yu laik go long balus long ron Talair i makim pinis, i orait tu—laik bilong yu!

I gat kain kain balus bilong baim-sampela

bilong karim faivpela man, sampela bilong karim nainpela na sampela bilong karim wanpela ten nain man.

Kam lukim mi pastaim na toksave. Em ol balus bilong Papua Niugini tru. Ol dispela balus i save go long olgeta ples bilong Papua Niugini, maski em i liklik ples o nogat. Sapos ples balus i stap—mi inap! opis bilong Talair i stap long olgeta taun bilong Papua Niugini.



TRAIM TALAIR—EM I LAIN BALUS BILONG YU NA PAPUA NIUGINI STRET

TALAIR
 PTY. LTD.


TSO102



* Mista Ruben TOKOME edministretiv ofisa bilong Para Medikal Koles.



* Mista Ieat DIKA i bringim sikman long bet bilong em.



* Ol Para Medikal studen i painim marasin na bringim long haus sik.

PARA MEL

I gat wampela tasol Para Medikal Koles long hap bilong Pasifik. Dis-pela koles i stap long Madang na em i wok 12 yia nau. Ol 180 greduet i pinisim dispela koles na ol i save wok long olgeta hap bilong Papua Nu Gini. I gat tupela kain greduet long Para Medikal Koles:

Namba wan - em ol HELT EKSTENSIN OFISA o medi-kal asisten. Ol dispela lain i kisim save long helpim ol sikman. Yu ken painim ol long planti et pos na long planti haus sik.

Namba tu hap bilong ol greduet i kisim save long lukautim haisin, em i olsem, lukautim bai ol man i gat gutpela wara tasol long dring, helpim ol long putim pam long ples bilong ol, inspek-tim haus kaikai, bai ol samting i klin tru, bai o jem bilong ol kain

* Tupela helt ekstensin ofisa i askim mama long sik bilong em.




KAL KOLES

sik i no ken go wantaim ol kaikai long bel bilong ol man na mekim ol i sik tru.

Ating planti bilong yupela i kisim pinis help long ol HELT INSPEKTA na ol HELT EKSTENSIN OFISA. Mipela i ken amamas long mipela i gat dispela kain koles. Planti arapela kantri i stap klostu long Papua Nu Gini i no gat Para Medikal Koles, olsem ol i laik salim ol studen bilong ol long Para Medikal Koles long Papua Nu Gini. Long yia 1975 bai 20 studen bilong Fiji, Nu Hebridis na ol Salomon Ailan i kam long Para Medikal Koles long Madang. Gavman bilong Filipin i harim pinis long gutpela wok bilong Papua Nu Gini Para Medikal Koles na em tu i ting long kirapim dispela kain skul long kantri bilong ol.



* Mista Cramer i lukautim Zemeru ZOBAL taim em i givim sut.



* Mista Udu SONAI i givim marasin long KINAGAWA.

Ol i amamas long nupela pam wara.



* Mista P.H. KOYAMA, rekruting ofisa bilong Para Medikal Koles.

Spendim 3 Milien Dolla Long Is Nu Briten

Is Nu Briten Distrik bai i kisim klostu long \$3 milien bilong mekim sampela wok bilong Gavman insait long dispela yia inap Jun 1975.

Dipatmen ov Helt bai i kisim \$60 tausen bilong wokim nupela haus bilong stuaaim ol marasin na moa long \$27 tausen bilong mekim ol arapela wok marasin.

Edukesen Dipatmen bai i spendim klostu long \$177 tausen long ol haiskul, seketerial na teknikal koles.

Plis Dipatmen bai i kisim \$178 tausen bilong mekim nupela wok long Rabaul plis stesin.

Vudal Agrikalsaral Koles bai i spendim \$70 tausen long wokim ol nupela haus slip bilong ol studen meri.

Na \$1.5 milien bai Gavman i spendim long ol rot na bris. Bai ol i pinisim ol wok long putim bitumen long Kokopo-Bitapaka rot na long Vunadidir-Vunamami rot; nupela bris bai i go antap long Warangoi riva; na \$360 tausen bai i go long baim ol wok long Malasait-Rounsapna rot insait long Bainings eria.


Meri Bilong Kandep



• Long hap bilong Kandep insait long Enga Distrik i gat bilip tru bilong Selp Developmen. Ol pipel, olsem dispela meri hia, long han bilong ol yet na long savol, baira, na stik yet, ol i bin wokim ol rot i 100 mail longpela. Long ol dispela wok ol pipel i bin lusim 12-pela yia olgeta.

Ating ol Kandep i makim we tru bilong helpim kantri bilong yumi go het.

Saten Hailans Helt Sevis Pundaun



• *Matiabe Yuwi*

Mista Matiabe Yuwi, Memba bilong Tari-Komo insait long Saten Hailan Distrik, i wari olsem 15 helt ofisa i bin kisim transfe long distrik bilong em long yia i go pinis na nupela ofisa i no bin senisim ol.

Nau ol wok long helt i laik pundaun nogut insait long ol rural eria.

Gavman i save tromoim planti mani moa long ol politikal developmen, Mista Yuwi i tok, tasol mani bilong mekim ol sosel developmen na sevis i sot nogut tru.

P.N.G. Wokim So Long Japan

Minista bilong ol Tret, Albert Maori Kiki, i tok nau Papua Nu Gini i wokim tripela so long Japan we ol pipel i ken lukim planti samting olsem kopi, kakau, lip ti, kopra, na wel pam i kamap long Papua Nu Gini.

Mista Kiki i tok ol dispela so i strong long soim ol kain timba bilong kantri hia, na tu ol kain atifek na ol wok i kamap long Bougainville Kopa.

Wanpela so i bin kamap long Tokyo, em bikpela taun tru bilong Japan. Namba tu so i bin kamap long Nagoya na namba tri bai i kamap long ples Kitakyushu long Kyushu Ailan.

Mista Kiki i tok inap long las yia PNG i bin baim planti moa ol samting i kam long Japan na Japan i bin baim liklik samting tasol i kam long Papua Nu Gini olsem planti mani moa i bin lus i go long Japan.

Nau Japan i save baim planti kopa i kam long Bougainville na PNG i save winim bikpela profit. Tasol Mista Kiki i tok em i no gutpela samting sapos ol profit i kamap insait long wanpela maket tasol olsem kopa. Nau PNG i hatwok long painim ol nupela maket bilong ol kain kain samting.

Plaim Kat - Maski Wok

Memba bilong Koroba-Kopiago, Andrew Wabiria, i wari nogut tru bai sampela kros i kamap insait long ol rural eria we planti pipel i hatwok tru long ol bisnis developmen tasol planti arapela i save sindaun nating long plaim kat nat tromoim mani bilong ol.

Ol dispela lain pipel bai i nogat gutpela samting na bai ol i mangalim nogut ol man i bin hatwok long painim gutpela sindaun.

Ol Lokal Gavman Kaunsil i mas strong long ol pipel insait long ol rural eria bai ol pipel i mas hatwok. Ol i mas save bai ol gutpela samting i ken kamap long hatwok bilong ol na olgeta man i mas wok wantaim. Sapos i no gat planti gutpela rot na bris, ol bisnis developmen i mas pundaun, Mista Wabiria i tok.

Tokaut Long Provisinel Sitisensip

Namba Wan Minista, Michael Somare, i bin tokaut strong ol memba bilong Pablik Sevis na bilong Haus ov Asembli i bin tanim nogut ol tok bilong Provisinel Sitisensip.

Nupela lo i no wok long strongim biknem bilong sampela ekspetriet, Mista Somare i tok. As bilong lo i wok long lukautim ol hapkas i bin stap long PNG oltaim na ol i no gat narapela kantri.

Husat i gat sitisensip bilong narapela kantri na em i laik kamap provinsinel sitisen bilong PNG pastaim em i mas lusim arapela sitisensip na em i mas mekim wanpela eksaminesen bilong soim em inap kamap gutpela sitisen.

Ol provinsinel sitisen i mas wet 8-pela yia inap oli ken kamap sitisen tru na insait long dispela taim i mas mekim bikipela wok tru bilong helpim PNG i go het.

Lokal Indastri Bilong Painim Sel

Dipatmen ov Bisnis Developmen i bin wokim wanpela kos long Hoskins insait long Wes Nu Briten bilong skulim ol pipel long painim ol sel bilong solwara.

Inap nau planti ol pipel i save salim ol lalai, blaklip, na talbum, em ol sel ol indastri i save yusim bilong wokim ol kain bilas na baten.

Nau Dipatmen ov Bisnis Developmen i laik skulim ol pipel long painim na lukautim gut ol kain sel ol pipel nating insait long planti kantri we ol i save tromoim bikipela mani bilong baim kain sel.

Narapela hap bilong dispela kos i wok long skulim ol pipel ol i no ken kisim ol liklik sel na ol sel i gat liklik bagarap long ol. Ol dispela sel i mas go bek long solwara bilong karim nupela.

Ol sel i no gat liklik bagarap long ol yet i ken go long ol ekspot maket. Ol pipel bilong ol arapela kantri i no laik baim ol narakain.

Greduet Bilong Para Medikal Koles



• Famili bilong Ofisa Kadet Keith Koivaku bilong Mabudawa viles insait long Westen Distrik, i amamas wantaim em long taim em i kisim setifiket bilong makim greduesen bilong em long Para Medikal Koles.

Dispela em i namba wan taim wanpela memba bilong Difens Fos i pinisim dispela skul.

Meri bilong Keith em Janet, na tupela pikinini em Nigel na Katherine.

Nupela Haus Kopra Long Buka Ailan

Minista bilong Helt na Memba bilong Not Bougainville, Donatus Mola, i bin opim nupela haus bilong stuaim ol kopra long Buka Ailan.

Dokta John Guise, Mi-

nista bilong Agrikalsa, i bin sanap wantaim Mista Mola na em i tok dispela haus kopra i kostim samting olsem \$60 tausen bilong sanapim na \$10 tausen moa i go bilong baim ol masin i stap long en.

Insait long wanpela yia dispela haus i ken lukautim ol kopra inap long 10 tausen tan hevi. Tasol Kopra Marketing Bot i ting long bungim liklik hap kopra long wanpela wanpela taim na hariap salim em i go long Rabaul o long Kieta.

Kos bilong kisim wanpela tan hevi i go long dispela tupela ples i kamap olsem \$18 na papa bilong kopra i mas tromoim dispela mani.


Dokta Guise i tok Mista Murray Tim bilong Marshall Lagoon insait long Sentral Distrik bai i bosman bilong dispela haus kopra long Buka Ailan na Mista Paul Laku bilong Bougainville bai i wok olsem inspekta.

Nau yu ken kisim tok i kam long olgeta hap bilong graun


Ating yu laik harim tok i kam long Englan.....
o yu laik harim musik i kam long Yurop
o kisim Sydney o Melbourne o Canberra.....
o yu laik kisim olgeta stesin bilong Papua Nu Gini.....

ORAIT, YU BAIM DISPELA REDIO NA YU WIN.

R 358 B
Deluxe Portable (3 Band MW/SW1/SW2)
12 Transistor 4 - Diode
2 Speakers with big output
Easy to read "Magic Meter"



R 247JB/HB
A/c/Battery operation 2 Band MW/SW
8 Transistor in Leatherette Cabinet




RF 399
Tuned RF Stage, 12 Transistors
3 Band (MW/SW1/SW2)
Signal strength meter
fine tuning.



BURNS PHILP (New Guinea) LTD
i save salim na fiksime



Nupela Kontrak Wantaim B.C.L.



• Siaman bilong Bougainville Kopa (BCL), Mista Frank Espie, na Namba Wan Minista, Mista Michael Somare, tupela i bin sainim o putim nem long nupela kontrak i tok orait long givim samting inap \$500 milien long PNG insait long 10-pela yia.

BCL i orait long investim moa mani insait long PNG na helpim ol narapela projek sapos Gavman i askim em pastaim, Mista Espie i tok.

Kampani i orait tu long givim bikpela trening long ol lokal pipel na sampela saveman bilong kampani bilong helpim Gavman long ol kain kain developmen wok.

Mipela inap wokim

OLKAIN SAMTING LONG KANDA

SALIM MANI I KAM

WANTAIM ODA

lukim ol
prais hia


Autim laik bilong yu tasol

olkain sia
olkain tebol
olkain basket
blain pangal

Mipela ken salim long sip
o balus. Rait tasol i go long:

**CANE INDUSTRY
PES-AITAPE, W.S.D.**

Bisnis
bilong ol
lokal pipel
stret



Laikim Nupela Skul Long Pomio

Tupela ofisa bilong Edukesen Dipatmen long Is Nu Briten i bin salim ripot long Distrik Edukesen Bot bai i gutpela samting sapos Dipatmen i kirapim nupela skul long ples Pekauna long Pomio eria.

Tupela ofisa hia em: Mista K. Taylor, Asisten Distrik Komisina, na Mista T. Carter, inspekta bilong ol skul insait long Pomio eria.

I gat ol sumatin inap long makim tripela tisa, tupela ofisa i tok, na ol papamama i orait long makim graun na sanapim ol haus skul na ol haus tisa. Ol i bin bungim \$5 tausen long dispela wok.

Ol pipel bilong tripela ples moa, Malmalu, Serenguna na Pulpul, ol tu i laik bai Gavman i kirapim tripela skul long ol ples bilong ol.

Helpim Ol Rural Bisnisman

Minista bilong Fainens, Julius Chan, i bin tok olsem: Gavman i makim \$1.5 milien bilong helpim ol rural eria i no gat gutpela developmen o kain bisnis i ken winim mani i kam long ol lokal pipel.

Inap long dispela taim ol program i wok long ol rural developmen ol i no givim helpim long ol lokal bisnisman.

Nupela program nau i laik helpim ol liklik bisnis i kamap insait long ol rural viles yet.



• Julius Chan

Taviai Senisim Kaumi

Mista Aisa Taviai nau long mekim ol wok bilong i mekim ol wok bilong Seketeri inap wanpela Seketeri bilong Dipatmen kot i ken stretim ol bilong Intiria. wari.

Seketeri i mekim wok Mista Taviai i bin wok bipo, Simon Kaumi, i bin olsem Dairekta i lukautmekim planti tokaut no-im ol bisnis bilong gut long Gavman na Gavgraun long tupela yia man i bin tambuim em inap nau.

Tripela Lokal Bisnisman Kisim Kontrak

Mista Ebia Olewale, Minista bilong ol Bisnis, i tokaut olsem tripela lokal bisnis man, wanpela bilong Wewak na tupela bilong Rabaul, i bin kisim kontrak bilong wokim sampela samting bilong go insait long nupela haus Gavman i wokim.


Mista Hiabake Lausi bilong Wewak bai i kisim \$6 tausen bilong mekim 20 kabot.

Mista Meriba Tovai bilong Rabaul i gat wanpela kontrak bilong wokim 200 tebol.

Mista Ezekiel Wartoeo bilong Rabaul bai i kisim \$2,500 bilong wokim 18 teng wara inap long holim 2 tausen galon wara na 6-pela arapela inap long holim 1 tausen galon wara.

Mista Wartoeo i gat narapela kontrak wantaim Gazelle Tras bilong wokim 137 teng moa.

TINGTING BEK - MIPELA I FRI



**Bruder GERHOCH i raitim dispela stori.*

Hotegan i no gutpela ples tumas. Taim ren i kam graun i malumalum, na i gat planti natnat tumas. Wanpela de moa ol manmeri i pilim skin i hat nogut. Ol i larim mipela i go long nara-pela ples nem bilong em KOIA. Em i longwe liklik na samting olsem tu na hap aua long wokabaut. Tasol rot i no-gut moa, na em i tais tasol. Isi isi sampela ol sikman i traim long i go long nupela ples. Mi helpim ol inap long Goso, em hap we, na 10 taim mi yet mi karim marasin inap long Koia, na mi go bek gen long Hotegan bilong bringim nupela marasin.

Long 27 Mas 1944 mi tu i stap long Koia olgeta. Ol ami i tilim liklik kaikai tasol long mipela, i no inap long ol i ken pulimapim bel. Tasol long wan wan de mipela i mas i go tupela o tripela taim long rolkol na pastaim long kaikai mipela i mas i go kisim wanpela tiket bilong kisim kaikai. Ol i paitim mipela long wan wan de.

Long 18 Epril sista Ehrentrudis i toktok wantaim mista Nishira, man bilong tanim toktok.

Mista Nishira i askim sista long sampela plaua bilong kukim bret. Sista i bekim yesa sapos em i givim mipela sampela rais. Em i orait, tasol taim sista i bringim plaua pinis, mista Nishira i pulimapim wanpela han long rais na givim long sista olsem bekim long planti plaua sista i bringim.

Nau sista i tok, wanpela han i pulap long rais em i no inap! Mista Nishira i kros na i paitim sista nogut tru, long pes na nek bilong em. Taim sista i kam bek pes bilong em i gat ol planti retpela na blupela mak. Narapela de sista i pilim sik na sampela de em i dai....

Long de 21 bilong Epril, Mista Nishira i paitim nogut bruder Sylwetser, bikos bruder i tokim em, em i pilim sik na em i no inap go long wok.

Long de 22 bilong Epril long apinun, ol ami i tok mipela olgeta i mas hariap long i go long ASRO, em i olsem tupela de long wokabaut. Husat bilong mipela i ken wokabaut? Tripela i gat sik nogut. Nishira i tok mipela olgeta i

stori namba foa

mas go, bikos ami bilong Amerika i stap klostu. Birua i stap klostu, yupela i mas klia.

Mi bekim tok, mi i no inap go sapos Dokta Braun i mas go. Ol sikman i no inap long wokabaut na bai i no gat man bilong helpim ol. Sapos mi go bai mi stap olsem soldia i ranawe long pait...

Pastaim em i laik sutim mi, bihain em i tok: "Mi givim ona long strongpela spirit bilong yu, yu ken stap na lukautim ol sikman. Tasol ol arapela i mas i go. Ol i go, tasol ol i no inap i go longwe. Lek bilong ol i solap na ol i no gat strong moa.

Long arapela de Pater Derowski i kam bek. Em i tok, ofisa bilong Japan i lukim ol pater, bruder na sista i no inap long wokabaut moa, olsem em i tok: "Yupela i ken go bek long Koia na lukautim yupela yet!"

Isi isi planti bilong ol i kam bek, na long de 25 bilong Epril P. Hagen, bruder Berchmans na Januarius i go long Hotegan. Ol i painim sampela soldia bilong Amerika.

Taim ol ami bilong Amerika i harim olsem planti bilong ol misinari i sik nogut. Kwiktaim ol i bungim 200 soldia na salim ol i go long Koia. Ol i kamap long mipela long 4 klok apinun. Mipela i tenkyu long ol na wara i kam daun long ai bilong mipela.

Long de 26 bilong Epril 90 soldia bilong Amerika i karim ol sikman bilong mipela na i bringim ol long nambis.

Taim mipela i kam long Hotegan, ol arapela soldia i amamas wantaim mipela. Mipela i ting em i driman tasol.

O God yu blesim na bekim gutwok bilong ol dispela soldia ol i helpim mipela.

Long Sande 80 soldia i kam long misa wantaim mipela. Ol tu i kisim Jisas long Santu Komunio. Long apinun ol i bringim mipela long ka inap long bikbot LST 459. Nau bot i go long Finschhafen. Ol gutpela dokta i mekim sekap long wan wan bilong mipela, na ol i givim mipela gutpela marasin na gutpela kaikai tu. Bi-hain bot i go long Mil-lanbay. Long de 13 Me 1944 mipela i go kamap long Brisbane long Australia.

BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem:

Adres:


Salim i kam long :

WANTOK - P.O. BOX 396 - WEWAK

The Phantom

®

By Lee Falk and Sy Barry



Lokal Anglikan Seplin Long P.I.R.

Seplin Steve Taumomoa bilong Wedau viles insait long Milne Bay Distrik i bin senisim Seplin Brian Lynes olsem Anglikan seplin bilong 1 P.I.R.

Dispela em i namba wan taim wampela lokal man i bin kisim wok bilong Anglikan seplin insait long PNG Difens Fos.

Seplin Lynes i pinisim 12-pela yia long Papua Nu Gini. Em i wok 5-pela yia olsem misinari insait long Milne Bay Distrik na 7-pela yia olsem seplin long PNG Difens Fos. Nau em i go bek long ples Canungra olsem seplin long wampela trening kam bilong ami bilong Australia.

* **Poto:** Seplin Brian Lynes i sanap lukim Kepten Kim Duffy i harim promis bilong Seplin Taumomoa long mekim wok insait long PNG Difens Fos.



Ol Kampani No Ken Paulim Lo

Namba Wan Minista, Michael Somare, i tokaut im ol wok na buk. gen bai Gavman i strong Insait long dispela long kotim ol kampani i taim Gavman i no laik paulim lo i wok long kotim ol kampani sapos stiaim ol wok bisnis. long laik bilong ol yet ol i stretim pasin bilong ol.

Planti kampani i stap Bihain long dispela nau long wampela lista taim, Gavman bai i glas- bilong go long kot. Gav- im gut ol bisnis na hu- man i laik wet nau inap sat i haitim ol kranksi 90 de tasol bai ol ara- pasin, em i gat kot. pela kampani i mas stret-

Lukluk Nabaut Bilong Ol Skul Liva

Ol skul liva bilong Fom 2 long Goroka Haiskul i bin pinisim wampela lukluk nabaut long ol kain bisnis insait long Isten Hailans Distrik.

Dipatmen ov Bisnis Developmen i bin helpim ol long glasim gut ol kain kain wok olsem: lukautim ol tret stua, draivim ol trak, wokim ol timba, gaden, na kofi.

Dipatmen ov Bisnis Developmen i tok em bai i no inap givim bikpela helpim long ol dispela studen bihain long taim ol i pinisim skul. Nau yet ol i mas stat long plenim wanem kain wok ol i laik mekim bihain long painim gutpela sindaun.

Ol WANTOK niuspepa bilong dispela yia, stat long mun Janueri inap long mun Jun, i stap nau insait long wampela buk.

* * *

Dispela WANTOK buk bai i kamap TUPELA TAIM long wampela wampela yia long mun Ogas na long mun Februeri.

* * *

Dispela WANTOK buk i nambawan samting bilong

- * helpim ol sosel stadi klas long skul
- * helpim ol adalt edukesen klas i go het
- * helpim ol i laik skul long TOK PISIN
- * putim insait long ol skul laibreri

* * *

I no gat planti WANTOK buk. Sapos yu laik kisim wampela, hariap makim tiket i stap hia na putim mani wantaim na salim i kam.

WANTOK PUBLICATIONS, Inc.
P.O. Box 396,
Wewak. P.N.G.

Mi laik baim WANTOK buk.

Nem bilong mi:


Adres bilong mi:

.....


Prais bilong wampela buk:

\$2.00 (+ 20¢ bilong baim stem)

\$2.00 (+ 45¢ bai em i kam long balus)



DISPELA ASPRO BILONG OL PIKININI



JUNIOR

...em i swit... ol i tanim wantaim wara bilong muli

Wok bilong em bilong rausim:

**FIVA - HET I PEN
TIT I PEN - KUS**

ASPRO
ORIG TRAD MARK

JUNIOR

Skel bilong givim long ol pikinini i olsem:

Pikinini i gat

- 1 inap 2 yia = kisim 1-pela kinin Aspro Junior
- 2 inap 4 yia = kisim 2-pela kinin Aspro Junior
- 4 inap 7 yia = kisim 3-pela kinin Aspro Junior
- 7 inap 12 yia = kisim 4-pela kinin Aspro Junior

Givim marasin olgeta 4-pela 4-pela aua.

Tambu long givim Aspro long pikinini i no gat 1 yia yet.

YU KEN BAIM LONG OL STUA MARASIN